

**RELATIO
TRIPLEX DE
REBUS INDICIS:
1. R.P. CORNELIJ
BEUDINIJ, ...**

Adriaen Lommelin, Nicolàs
Du Toict, ...





Ex Bibliotheca
majori Coll. Rom.
Societ. Jesu

I. 4. c.

1. 4. 7. 33.





RELATIO TRIPLEX DE REBVS INDICIS:

- I R. P. Cornelij Beudiniij, dicti
Godinez, martyrium.
- II Caaiguarum gentis mores,
coepta conuersio.
- III R. P. Adriani Knudde, dicti
Crespi, Elogium.



ANTVERPIÆ
Apud IACOBVM MEVRSIUM
AN. CID MDCLIV.

LECTORI



*Abes hic, PIE LECTOR,
vno in libello tria opuscu-
la, quæ singula non sine
spirituali voluptate legas;
quippe ad inflammandum
studio Diuini honoris amplificandi, cu-
randaq; alienæ salutis, animum, ac si-
mul sensu dulcissimæ pietatis perfun-
dendum, accommodata.*

*Primum est, vita ac martyrium R.
P. Cornelij Beudini, dicti apud
Hispanos & in Indiis, Godinez. Hic
è Societatis IESV prouinciâ Flandro-
belgicâ in Occidentalem Indiam mis-
sus, breui ad zeli sui brauium, coro-
namq; martyrij peruenit, apud Tarau-
mares Noua Cantabria populos, die IV
Iunij anno CIO. IOCL.*

*Alterum libelli huius opusculum
est Relatio de Caaiguarum gentis situ,
moribus, cæptâ institutione ac conuer-
sione, ex litteris, quas R. P. Nicolaus
du Toiet, del Techo dictus, Insu-
lenfis,*

lensis, è prouinciâ Gallobelgicâ Societatis IESV in Paraquariam ante plures annos missus, in Belgium scripsit anno CIOIOCLI ex Residentiâ S. MARIE Maioris ad Vruaicam fluvium.

Tertium denique est Elogium R. P. Adriani Knudde, dicti Crespi, Brugensis è prouinciâ Flandrobegicâ Societatis IESV in eandem Paraquariam missi: ubi cum multos annos assidue in Barbarorum institutione desudasset, tandem sanctis laboribus XXV Februarij, anno CIOIOCLI immortalis, ad eorum premia euolauit in calos.

Tria Teuicissim rogo, LECTOR: I, ut horum pugilum certaminibus ita applaudas, ut Deo, cui laborant, causq; gratia excitantur ac roborantur, gratias agas. II, Ut eorum, qui tales operarios litteris & virtute informant, & in illam Domini vineam mittunt, consiliis ne intercedas, sed potius quâ potes ope subsidioq; iues. III, ut pro miserorum illorum, qui adhuc in tenebris & umbrâ mortis sedent,

dent, salute Deum preceris, ut plures⁵
in horrentem illam vineam idoneos
operarios immittat, suâque gratiâ eo-
rum promoveat conatus. Vale.



A 3

ELO-



R.P. CORNELIUS BEVDIN *dictus* GODINEZ,
Belga Grauelinganus, è' Societate IESV,
in America à Barbaris ex odio fidei
interfectus 4 Junij. 1650.

7

ELOGIUM
 R. P. CORNELII BEVDIN,
 DICTI GODINEZ,
 GRAVELINGANI BELGÆ
 E SOCIETATE IESV,
 IN MEXICANA PROVINCIA
 à barbaris in odium fidei inter-
 fecti Anno MDCCCL, IV Iunij.



Vit illa Societatis nostræ à primo eius exortu mens ac studium, vt quidquid vspiam terrarū postremis hisce temporibus patefecit Regum labor, Christianis institutis excolendum susciperet. Neque verò vtilis ac tantis muneribus pares operas ad id sollicitè conquirere, aut instigare debuit. Quoties enim, ad vtramque Indiani mittenda fuere subsidia, ingens illicò profectionem illam vltro ac certatim sibi deposcentium multitudo delectum moderatoribus dubium fecit. Quod qui perpenderit, pariterque in incommoda & pericula, quæ expeditiones

illæ secum trahunt, intenderit animum, non poterit non diuinæ gratiæ magnitudinem & vim admirari atque extollere, quæ tam viuidum tamque aduersus dura omnia paratum ardorem suis iniiciat. Quod si verò labores illos gloriosæ mortis genus excipiat, tum sanè vel maximas Deo referre par est gratias, & rei seriem, quoniam exempli interest, litteris prodere. Eâ de causâ R. P. Cornelij Godinij, vel, vt paternum eierat nomen, Beudinij virtutes mortemque paucis complecti visum fuit: qui quam in Mexicanâ Prouinciâ Crucem, velut religionis trophæum præ templi foribus crexerat, suo ipse sanguine conspersit, ac ne mortis causa vlli obscura esset, in eiusdem triumphalis signi complexu à barbaris laqueo astrictus vitam posuit.

Anno CIOIO CXV Grauelingæ, munitissimo Flandriæ aduersus finitimos Gallos oppido, natus, luculentam indolis ad omnem honestatem propensæ significationem adhuc puer dedit. Oblectatio non aliunde illi maior, quam è pietatis exercitationibus, quibus illa tum ætas capi poterat. Singularis in Dei matrem amor, quæ in teneris præsertim animis suavis ac potens esse solet virtutum omnium illecebra, animum illius iam tum penitus occupauerat. Ad eius arulam domi à se excitatam Litanias Lauretanæ, quod

quòd canendi artem rectè calleret, domesticis sabbato præcinere solennis illi mos fuit. Bergis S. Winoci cùm litteris operam daret, præterquàm quòd inter æquales præsumptumque primas ferret, & laudem ab honore Magistris delato obsequendi quæ studio planè singularem mereretur, tum præcipuè gratiam illi & commendationem peperit verecundia, & quæ illam comitari solet, pudicitia. Hanc oculi, vultus, sermo, & ad omnem modestiam compositi mores præferebant. Quæ ne maligno aliquo afflatu inficeretur, si quibus remissionem animi dissolutionem esse animaduerneret, ab eorum consuetudine se subducebat. A sæminis ita abhorrebat eius animus, ut cum brutis potius, quàm cum illis, habitare se malle, ioco planè serio dicere esset solitus. Ex omni scholasticorum numero, qui sacram synaxin religiosius frequentiusque adiret, nemo erat. In sodalitate Partheniæ, siue publico in eâ munere fungeretur, siue aliâ ratione testandus esset Virginis cultus, nihil non egregiè & constanter præstabat. Ex illo tam lætè sese efferentis adolescentiæ flore, quas esset ætas maturior virtutum fruges datura, non difficilis esse potuit diuinitas. Confecto studiorum humaniorum curriculo, Societatem nostram, ad quam diuinitus se impelli credebat, summis votis expetuit.

petiit. Verùm cùm Mechliniæ in ipso Collegio censuissent nostri, ludum elementariis pueris ob causas aperiendum esse, è quo deinde ad Latinæ linguæ rudimenta gradum facerent; Cornelius prius in hoc ludo Magister tirocinij genus quoddam iussus est ponere, quàm ad societatem aditum reperiret, siue quòd non alius facile è candidatorum numero esset, qui venustius litteras pingeret, siue vt hoc experimento eius probata constantia pateret illustrius. Iucundum memoratu est, quâ ille alacritate, quâ industriâ atque prudentiâ illam paruulorum turbam instrueret, & in officio contineret. Eo igitur munere gnauiter functus Societatem inijt anno MDCCXXXV, 1 Martij: & vt fluuiorum, quorum cursus paulisper inhibuerunt iniecta repagula, iisdem laxatis vehementior est impetus, ita Cornelio admissionis illa prorogatio visa est vim vigoremque ad religiosæ vitæ studium addere. Argumento id sit, quòd inter tirones, quorum incitati erant ad pietatem spiritus, si non præferri ceteris, certè nulli postponi meruerit. Inde Louanium ad Philosophiam audiendam se contulit, neque contentionem pristinam non remisit tantum, sed intendit potius, virtuti æquè ac doctrinæ comparandæ intentus animus. Mechliniam postmodum, vt humaniores litteras

ras

ras iuventuti traderet, remissus, plurimum sibi fuit hanc gratulatus sedem, quod istic quotidie inspicere tamquam in speculum in tironum vitas, ex iisque sumere sibi exemplum posset. Ita plerumque avidius solent laudanda in aliis imitari velle, quorum ad imitationem & alij possint cum laude vivere. Disciplinæ quippe religiosæ usque cō semper retinens fuit, ut qui in eius dicta factaque observatè introspexerunt, nullam ab eo instituti legem violatam animadverterint. Precandi studium præcipuum semper habuit: neque si quid fortè aut moræ aut impedimenti interuenisset, conquirere poterat, nisi plenè cumulatæque Deo & sibi fecisset satis. Crebra & ab intimis profecta sensibus erga sacrosanctam Eucharistiam veneratio magnas illi subiiciebat ad amorem diuinum inflammandum faces. Manè & vespere, à prandio itidem & coenâ, ante relaxationem animi, & mox ab illâ, septiesque per diem, dum Theologiæ auditor esset Louanij, diuinis hisce mysteriis reuerentiam præstitum ibat. Quoties illa perceperat, suavia cum Deo in longum protrahebat alloquia, ex cuiusque vultu animum diuina spirantem, gaudiisque cælo haustis delibutum, nulli non deprehendere proclive erat. Tertiò studiorum anno sacerdotio ut initiari posset, obtinuit, satis prudens

prudens tantum pietati additum iri, quantum studiis detraheretur, vberrimorum accessione meritorum. Hæc diuinarum rerum sedula tractatio, ex iisquæ delibata suauitas impensio rem ei iniecit curam, ne quid admitteret, quod votis Deo factis non maxime consentaneum esset. Amorem cultumque paupertatis non leuibus indicibus prodidit. Quorum illi vsus erat ad vestitum necessarius, eò cariora sibi esse ostendebat, quò obsoletiora essent. Frequenter admodum se in triclinio accusabat, & vili ac detritâ lineâ in veste procedebat, scutellam ligneam manibus præferens, quâ cibum potumque exciperet, pauperum, quâ licuit, æmulatus morem. Hinc illa profluxit in egenos ac pannosos beneuolentia, eorumque non infrequens, & affabilis, officiisquæ etiam testata congressio. Magnâ industriâ, magnâ omnium approbatione Louanij doctrinam Christianam pauperibus exposuit, atque illis præmiorum loco vestes anno vertere distribuit, corrogatâ ab iis stipe, quibus pecuniæ tam bonâ causâ impensæ fructus voluptati erat. Mechliniæ annis pluribus Musicæ, quæ in templo nostro Dominicis ac festis diebus haberi consuevit, curam gessit expensis omnino modicis, paupertatis scilicet votæ semper memor. Musculæ, quæ Musicis honestioribus post
anni

anni vnus obsequium erogabat, parua cum essent, maiora faciebat bonus paupertatem religiosam excusantis vultus: egentioribus, cum omnium simul operâ uti non posset, ne nulli deesset, per vices tempora assignabat sua. In Indiam abiturus nostrorum vni, quicum familiariter vixerat, quidpiam ab eo flagitanti, quod eius tanto locorum intervallo absentis mentoriâ subinde redintegraret, ipse qui elegantium & exquisitarum rerum inops semper fuerat, nihil præter icunculam dedit, qualis in mensuris suffragiis cuique solet fortitò obtingere: cuiusque tergo nomen suum inscripsit, id vicissim ab optimo sodale postulans, ut itinerum suorum laborumque, quos optabat, successus orando proucheret. Castum integrumque eius animum ex iis, quæ suprâ memorauimus, prout est intelligere. Primi enim illi virtutum satus, si cura & quasi diligentis coloni manus accesserit, solent radices mittere altius, & iucundius efflorescere. Atque adeò qui iam inde vsque à puero quadam naturæ inductione ab omni impuritate abhorruisse visus fuit, non multò magis eandem voti religione execrandam duxerit. Qui res eius omnes diuturno vsu cognitâ & exploratâ habuit, primæque integritatis atque innocentie non dubia in eo signa comperit. Cum adolescentes informa-

ret litteris, si quid leuius ab iis dicto facto-
 ue commissum animaduerneret, quantu-
 lumcumque id erat culpæ, magna illic
 vultus sermonisque grauitate redarguebat,
 non ignarus, quàm de facili licentia, si qua
 iuuentuti permittitur, in maius malum eua-
 dat. Neque castimonie tuendæ præsidia
 negligebat. Corpus asperitatibus atterere,
 in culinâ ollas ac lances abstergere, coquo,
 cum vacatio esset à studiis, operam præsta-
 re, familiare illi erat. Minus commodè va-
 lenti tamen si deesset interdum aliquid, ni-
 hil sibi deesse querebatur, eorum esse hanc
 querelam reputans, qui sibi cari sunt. Ex
 Præsidum suorum voluntate ita aptam
 semper atque suspensam habebat suam, ut
 quidquid statuerent, non hominum, sed
 Dei iussa esse crederet. Quidam è nostris
 ad docendas litteras primum admotus, su-
 premæ classi Grammatices præficiebatur,
 ipse infimæ nec id quibusdam probabatur,
 siue quòd temporis ab ipso elementarius
 pueris informandis antea impensi rationem
 aliquam habendam putarent, siue aliis de
 causis. Ille composita, ut erat semper, men-
 te; Quid est, inquit, quòd illud moderato-
 rum decretum minus vobis placet? si quid
 inde proueniret molestiæ, in me illud omne
 redundaret: at ego, cui infixum penitus
 animo est, à Deo profluere, quidquid illi
 statue-

statuerint, illorum perinde voluntati, ac diuinæ acquiesco. Neque segnius quam dixerat fecit. Consequentibus enim annis quidquid Magistro illi gratum & commodum fore intelligebat, præcipuâ quadam curâ diligentiaque complexus fuit, ac præstitit.

Atque hætenus domesticâ tantum & umbratili proluſione exercitata est Cornelij virtus: educenda nunc est in solem ac puluerem, in legitimum plenumque certamen. Excubabat in omnes occasiones, quibus se pro Dei gloriâ, & alienæ salutis procuratione deuoueret, cum ecce commodè accidit, ut in Occidentis Indiâ suppetiæ peterentur. Ut his accenseretur, eò diligentius institit, quò angustior erat mittendorum numerus. Capita erant vniuersim quindecim: Sacerdotes ex Hispaniâ quatuor, è Gallo-Belgicâ totidem, totidem è nostrâ Prouinciâ, præter tironem è Burgundiâ vnicum, & qui copiosas has deduceret, Indiæ Procuratorem cum socio. Igitur voti compos non aliud versabat animo, quàm quod ad aspera & extrema quæque subeunda pectus armarer: recurſabat assiduè I E S V inexplebilis amor, animarum pretium, expeditionis aggreſſiendæ dignitas: hæc scriptæ ab eo litteræ, hæc priuata colloquia referebant. Neque non videri possit iniecta illi diuinitus præſagatio, quam familiariter de morte suâ sæpius

sæpius prodidit. Ostendâ in Hispaniam ve-
la facturus, cum Bergis S. Winoci paulif-
per subsisteret, & scholastici interim pasto-
ritio dramate felicia illi ac fortunata omnia
precarentur, beneuolis adolescentium stu-
diis animisq̃ue recreatus, maximoperè ad
extremum eos rogauit, curæ haberent
Deum pro se precari. Ad labores enim se
pergere pastoritios illos quidem, sed peri-
culis magnis circumfessos. Oues esse illic
non ita mansuetas, atque ipsi essent: infe-
stos potius & cruoris sitientes lupos circum-
cursare: ire itaque se, vt Deo istic, Deo im-
molaretur. Non absimile quiddam Sacer-
doti Musicæ artis gnato innuit. Dolebat
hoc bono Sacerdoti, vt quisque artem ferè
æstimat, in quâ præstat, P. Cornelium Mu-
sicæ peritiâ planè excellentem, in terras toto
à nobis orbe diuisas ac barbaras euocari. At
nos, inquebat, hic inter barbaros, inter vi-
tæ discrimina & tormenta sublimiore voce
cantuq̃ue modulabimur aliquid, quod Cæ-
lestium choros capiat. Diuinitus id ipsum
cognouisse creditur mulier claræ ob san-
ctimoniam famæ, quæ discedenti benè pre-
cata, non dubiâ martyrij subeundi spe im-
pleuit Cornelij animum: iret proinde ala-
cer: prosperè cessuram profectiōem: ad-
futurum arduis consiliis & periculis Deum:
labores gloriosâ apud Indos morte termi-
natum

natum iri. Anno **CIDIDCXLVII** XIII Iulij, Gadibus in Indiam soluit, cum aliis, vti dictum est, è Societate nostrâ quatuordecim, classe tredecim nauium vectus. Nauigationis tædium subleuabat nonnumquàm fidium vocisq̃ue concentu. Accedebat magna ingenij suauitas, & integritas morum, quæ illum omnibus, & Hispanis in primis, gratum reddidit. Neque erat fructus expers festiua & virtutis quadam maturitate temperata agendi ratio. Inducebantur illâ deliniti vectores, vt peccata apud eum expiarent, eiusq̃ue consiliis monitisq̃ue se permitterent, cuius benignitatem amabant, reueriebantur prudentiam. Subtristior visus est esse, cum in Belgio degeret: sed vnâ cum cælo indolem mutasse diceres, aut Deum potius eius vultum vnxisse oleo lætitiæ, vt quem ad martyrij palmam delegerat, ad ardua certamina non æquo tantum paratoq̃ue animo, sed etiam gaudenti deduceret. Quid enim asperum putet, qui cælestis triumphî prælibatâ dulcedine diffundi sibi pectus sentiat? Porro nauigationis hic cursus fuit. Secundo vsa vento classis insulas Fortunatas septimo die, decimoquarto promontorium Viride præteruecta, cursum vsque ad Kal. Augusti constantem semper tenuit. Tum non nisi clarâ luce vela faciens, ne fortè in scopulos aut paruas

insulas per tenebras impingeret, noctu in anchoris stetit. Vigesimo Augusti insulam (Baialaquada ei est nomen) amœnam ac fertilem attigit, Hispanis habitatam, ubi nostri prima Americæ impressere vestigia, dum interim nautæ dulcem aquam, & annonam in naues conuehant. Inde digressis incommodarunt vehementer omnibus post dierum aliquot nauigationem calores maximi, nullo ad octiduum ferè temperati vento: vnde & importata nuper aqua graue olere, & scatere vermibus caro etiam recens coepit. In hac malaciâ iucundum spectaculum piscatus dedit. Pisces prægrandes, quos Taburones vocant, præter alios formâ & colore peregrinos, capti: pisciculi quoque turmatim extra aquam latis longisque pinnis instructi volitabant, qui quod eos Taburones persequerentur faciliè centeni & plures repentè vnâ exsiliabant aquis, ferebanturque per aëra pernitate tantâ, quantâ nec aues pennis. Post hæc cum spirante iterum vento prouherentur, quæ rerum est inconstantia, mutatâ derepentè cæli facie, coeperunt aduersi ab Occidente spirare valentissimè venti, mare intumescere, dispergi classis, præsentis exitij metu consternari etiam nautarum animi. Nauis porticus, in quâ tres è nostris confidebant, concussa ac penè sublata est: dissiliere tigna, imma-

nes

hies ferrei vectes curuati ruptique, tanto fragore, vt qui in inferiore naus parte attoniti pallentesque trepidabant, procellarum vi nostros vnâ cum porticu in præceps datos abreptosque fluctibus crederent. Aliâ in nauis cum ingruentium aquarum vim egerere se posse diffident, mors omnibus ante oculos versabatur, ad eamque sese expiatis confessione animis componebant. Tenuit illa tempestas dies ferè sex, cum iterum lenior aspirauit ventus, qui in sinum Mexicanum, ac deinde in portum Veræ Crucis pridie S. Matthæi nostros incolumes valentesque perduxit, die, postquam Gäditano portu exierant, primo & septuagesimo. Mira hîc Patrum nostrorum, qui oppidum Veræ Crucis incolunt, in Europæos & inexpectatos hospites fuit beneuolentia, & caritas. Lætitiam auxit, quod viderent nostri Deo singulariter curæ se fuisse. Triduo quippe postquam appulerant, sæda rursus & atrox coorta tempestas, quæ classis partem reliquam seriùs aduentantem miserabiliter excepit. Vna in portu nauis demersa, altera nostris aspectantibus vado illisa, fluctibus altera in incertum acta nusquam comparuit. Tabulæ postea nostris dum per oram maritimam mulo inuecti Mexicum petebant, conspectæ in littore, felicitatis suæ ex alieno naufragio triste monumen-

B 2 tum;

tum. In Mexicano itinere altissimarum rupium, ac niuibus etiam sub zonâ torridâ perpetuis conspersarum horrenda præcipitia, & pariter amoenissimus peregrinarum arborum, pecorum & psittacorum conspectus adferebat proficiscentibus aliquid, quod terrori simul, & voluptati esset. Custodum interim Angelorum non rarò imploratum auxilium, actæque illis gratiæ, qui mulorum vestigia per viarum prærupta & rapacissimorum fluminum cursus inoffensa regerent. Angelopolis petebatur, adeoque tam benè ominatum ciuitatis nomen memoriam ad id excitare nostrorum potuit. Collegij Angelopolitani Rector ad sedecim leucas obuiam nostris processit: in quo nescias prolixumne magis iter, an animum mireris. Cùm hîc ad octiduum substitissent Patres, & vires animosque ex maris nausæa recreassent, Mexicum profecti, R. P. Prouincialem Petrum de Velasco, nouæ Hispaniæ Prioregibus editum, ac virtute illustriorem virum, cum R. P. Rectore, aliisque Mexicani Collegij Patribus, ad tres leucas obuium amplexati sunt. In vrbe Comes de Saluatierra nouæ Hispaniæ Prorex, iamque Peruano præficiendus regno, aduentum nostris gratulatum venit, eâ ipsâ horâ, quâ Collegio pedem intulerant. Biduo post idem ab Illustrissimo Archiepiscopo

po Ioanne de Mangesca factum, insigni amoris, quo Societatem nostram vterque complectitur, testificatione. Superuacuum hîc sit commemorare Mexicanorum Patrum effusam maximisque officiis ac studiis hospitibus patefactam beneuolentiam. Admirabilem potius persequar Cornelij nihil præter barbarorum salutem anhelantis cupiditatem, quam obstacula, tametsi sub initium multa obiicerentur, retardare nulla potuerunt. Primum enim Mexicani nostri, quorum oculos in se conuerterat, detinere apud se nitebantur optimum & ad omnia accommodatum Patrem. Inde cum ad Tepozutlanum Collegium, vbi celebre est seminarium, diuertisset, à quibusdam multa in medium allata, ne in barbarorum fines se immitteret. Insuper Burgundus quidam Pater, qui indigenarum salutem vtiliter alio in loco procurabat, eum vehementer obtestari cœpit, operam secum eodem conferret. Sed Cornelio persuaderi nihil potuit, iniectæque frustra moræ, vrgente maiore vi Numinis. Itaque ardens animi nihil nisi labores sudoresque affectabat, quos ipsa, si Deo placeret, martyrij laurea solaretur. Indecorem se fore credebat, vt ipse sæpè loquebatur, si tantam terrarum & Oceani interfusi vastitatem emensus, iisdem ferè, quibus patrio in solo destinendus fuerat, se

implicari permetteret. Vinculis, quæ iniiciebantur, solutus ac liber, iussus primum fuit ad Neophytos doctrinâ Christianâ recens instructos curam conuertere, & in partem laborum venire, quos sustinebat P. Viglius Maes, Flander, vir spiritus planè Apostolici, & puritatem Angelorum suâ æmulantis. Verum neque his finibus contineri potuit Cornelij ardor. Parta quidem tueri gloriosum esse ducebat; sed noua partis adiungere, yti periculi, ita & gloriæ plus habere. Per inculta & aspera, quâ nulla adhuc esset via, quâ efferata barbaries densis superstitionum vepretis siluesceret, latum optabat patentemque limitem aperire. Pericula sibi non timorem, sed calcar addere, recursum te identidem sanguinis pro Christo effundendi spe, animosque faciente. Moderatorum igitur approbatione nouæ excursionis Christianæque colonix fundamenta apud Taraumares iecit. Neque principiis opportunitas, diuino oblata consilio, defuit. Nouæ Cantabriæ Gubernator è montium siluarumque latibulis ingentem eduxerat barbarorum turbam, ab eisque oram fluminis Pagigochi insideri iusserat. Redigebantur paulatim in pagorum formam mapalia, ad aliquam socialis vitæ speciem coalescentia, & pariter copiosa offerebatur laborum materies in tantâ tamque rudi multitudine

Chri-

Christianis præceptis informandâ. Societatis nostræ operam hac in re implorauit Gubernator: ac prouinciam hanc sibi velut diuinitus oblatam, & à moderatoribus impositam arripiens Cornelius, incredibili alacritate animi, indefessoque studio ad eam sese comparauit. Tribus non ampliùs mensibus barbarorum linguam non perdidicit tantùm, sed, vt secuturis quoque prodesset, eorumque in discendo leuaret laborem, elementariis etiam præceptiunculis ac formulis illustrauit, & copiam varietatemque verborum, litterarum digestam ordine, in commentarium retulit, & ipsè in Societatis nostræ bibliothecâ inter scriptores recensendus. Facere non possum, quin vtar hîc ipsius verbis, quæ in litteris suâ ipsè manu scripsit 7 Nouemb. 1647. Quarum breuitatem dum excusat; Pluribus, inquit, scriberem, nisi me curâ discendarum linguarum auocaret. Nam in Mexicanâ, deinde in Cynaloanâ, & aliis insudandum, vt me Euangelij ministrû idoneum exhibeam. Quæ cura non tantùm mihi non molesta, sed etiam pro IESV meo dulcis, dum occurrit vel vnica cogitatio fructus, quem hic feret labor. Ita ille de suo linguarum studio; quarum iam peritus, velut accinctus instructusque armis miles, Euangelij explicare signa per Tauramares coepit. Erudiebat populum legum

omnium & Dei ipsius signarum: nunc puerorum, nunc grandium natu cogebat coetus, & utrosque in Christi verba adigebat: nunc infantes, nunc mysteriis nostris instructos lustralibus initiabat sacris. Laborum suorum lectas primitias ad templum ductabat: sacrificiis, quibus Deum ipsis propitiaret, iubebat reuerenter interesse. Iungebat Christiano ritu connubia: percurrere pagos, subibat casas: ad honestæ vitæ capeffendam retinendamque formam aliquam amicè & comiter singulos hortabatur: denique ne quid prætermitteret, interdum sacra carmina non illis profectò terris priùs audita, virginibus ac pueris præibat, impulsisque fidibus aurium delectationi seruiebat, ut animos caperet. Iamque feliciter satis res procedebat, poterantque illa è stipitibus ac longuriis temerè & sine arte facta mapalia in cæli municipia conuerti. Stabat & horum progressuum inuectæque religionis clarum monumentum ante templi vestibulum Crux, ipsius Cornelij manibus defixa, post etiam sanguine eiusdem imbuenda. Verùm ut est inexpiabile dæmonis in Deum hominesque odium, nec aliquid vnquam, quoad potest, diu crescere & assurgere patitur, eius instinctu, & Taraumarensum aliquot perfidiâ, ut sunt ingenio mobili & ad subita consilia præcipientes

tes barbari, rerum benè cœptarum interruptus est cursus. Institutioni à Patre acceptæ renuntiant, sedibus emigrant, pristina latibula repetunt, defectionis ansam sibi dari mendaciter questi, quòd Hispani suos iniuriosè tractarent. Adsunt vnà cum aliarum nationum colluie, quam in partes traxerāt, sagittis instructi armatiq̃ue. In Hispanos ferociter irruunt: multos fortunis, vitā non paucos exuunt. Parui esse momenti credita est hæc primū irruptio, sponte desitura, torrentium more, qui posteaquā pluuiis aut solutis niuib. intumuere, subsidunt. Sed inanem hanc opinionem ac spem fuisse declarauit euentus. Effrænatus namq̃ue ille & præceps furor, rapinis populationib. q̃ue factus incitator, vires acquirebat in dies. Cornelius interim nihil sibi, reliquo tantū & adhuc tenello gregi metuens, stationem tuebatur, & excubabat assiduè, ne, si pastore destitueretur, per auia & inuia palabundus erraret. Admonebant illum quidem nostri, medio sese ex hoste reciperet: experiendam non esse armatam transfugarum insaniam, nihil æquitati, nihil notitiæ veteri beneficiisq̃ue testatæ, nihil inermi innocentiae daturam. Tutum etiam è vicino vrbs præsidio offerebat commeatum Didacus de Lara vrbs Præfectus. Sed pericula periculis componens, illud quod desertæ disper-

dispersæque adirent animæ, anteponebat suo. Tandem anno CIOIOCL, IV Iunij, ipso Pentecostes peruigilio, die quo Apostolorum quispiam spiritum Numinis plenum optaret pro Christo effundere, dato immani vociferatione signo, repentè sub noctem, Cornelij tugurium inuadunt barbari. In eam cum Patre sese subduxerant Indi aliquot susceptæ religionis tenaces, & Hispanus miles vnicus. Is Fabianus Vasquez appellabatur, qui tametsi perpetuò in omnes casus comitaretur Patrem, in hoc tamen supremo discrimine vim vi repellere vetitus, fortiter potius iussus est, si ita res ferret, hostem & mortem opperiri. Illi tugurium dum obseratis ianuis munitum obseruant, subiectis flammis incendunt, quibus alimenta præbebant stipites & cannæ, pauperis substructionis materies. Inuoluebatur primùm denso fumo, ac deinde crepitantibus flammis æstuabat casa: adeoque foras prodire compellebantur, quotquot in eâ delitescabant; & prosilietunt ante alios indigenæ. Verùm dum mortis genus vnum euadunt, alterum incurrunt, & flammis erepti, coniuratorum perfossi telis concidunt. Triste spectaculum Cornelio mox insequenti obicitur, iacentes ante ipsa casæ suæ limina cruenti & exanimes carissimi atque amatissimi, quos Christo genuerat, filij, periculorum,

lorum, & quod illi erat potius religionis & constantiæ in adeundo martyrio socij. At quasi ab ipsâ tectorum deflagratione, & innocentium cædibus increuisset incendiariis & homicidis furor ac rabies, horrendum rursus vario dissensu ingeminantes clamorem, cateruatim in Cornelium irruunt. Probris primùm & conuiciis explent animum, quæ capitalis scilicet odij & designatæ cædis causas aperirent. Malorum quæ patcerentur culpam præcipuè in Patrem conferunt: hunc Hispanos fouere, hunc sacris eorum præesse, hunc religionis obtentu incolas à reliquorum cœtu seuocare, perfidum ac proditorem esse. Nec mora: funem collo eius iniiciunt, humo affligunt, contundunt verberibus, ad sacellum raptant, eâ atrocitate ac violentiâ, vt capite ad terram identidem alliso, remanerent sanguinis per viam sparsi vestigia. Ab aris iterum ad cœmiterium facta decursio: atque illic ad sacrosanctam Christi Crucem prosternitur strenuus miles, qui hoc militiæ suæ signum in ipso sacelli aditu, velut castrorum suorum vallo, defixerat. Tum fauces retorto fune ita validè intercludunt, vt sanguinem collo expresserint, qui laqueum imbuit. Mox Indicam clauam graui & ingeminato ictu in caput adigunt. Neque hîc stetit furor. Sagittis quoque exanimem transfigunt, vt è
Cruce

Cruce, cui adhæserat, celerius in cælum euolaret liber spiritus. Atque ita potitus voto suo Cornelius, quod verbis toties animoque prodiderat, generosam inuictamque animam Deo reddidit, procumbens ad dexterum Crucis latus, signum hoc antè diu multumque amplexus, sanctiore quam ex veteris militiæ ritu Romani signa & aquilas mediâ etiam in morte complectebantur, hæc sacra sua, hos dicti sacramenti testes, hos vnicos bellorum Deos superstitione nuncupantes. Exstinctum corpus veste barbari spoliarunt, inde ad prædam versi, quidquid supellectilis, quamquam curtæ ac tenuis, in eius casâ repertum fuit, secum asportarunt. E sacello direptæ imagines sacræ, & sacrorum paratus. Per ludibrium malis artibus ac veneficiis infamis nebulo sacram vestem ac pallium, quo Pater rem diuinam peregerat, induit, vt credo in patrata cædis accersitum argumentum duceret religionis causam. Et iam fama tanti sceleris vicina loca compleuerat, eaque excitus militum Hispanorum ductor, qui villam de Aguilar præsidio tenebat, frequenti equitatu Pagigochim properat, barbaris interim fugâ elapsis, & intra montium accessus & lateras aduolutis saxis aduersus hostilem incursum sese munientibus. Ingens verò secuta Hispanorum comploratio, vt primùm conspexere

conspexêre nudum & cruentatum Patris corpus, clauâ contusum caput, fauces laqueo elisas, latera sagittis confixa. Quod pro tempore poterant, ablutum exterius-que corpus Christiano ritu terræ mandarunt, in veneratione olim pretioque habendum, cum in Taraumarensum agro ampla eiusque sanguine rigata nostræ religionis sementis excreuerit. Nouæ Cantabriæ Gubernatoris vxor, matrona pietate æquæ ac genere illustris, laqueum Cornelij sanguine conspersum sibi dari petiit, cumque pyxide argenteâ, ad hunc vsum factâ, religiosè asseruat. Martyrij huius, vt à me narrata est, feriem, ab idoneis & oculatis acceptam testibus, ac litterarum publicarum auctoritate legitimè obsignatam, idem Gubernator ad nouæ Hispaniæ Proregem detulit. Ceterum quæ Martyribus quibusdam fuit gloria, vt cum in summâ temporum acerbitate, ac dirissimâ tyrannorum sæuitiâ occumberent, mitiorem illicò à morte suâ rerum faciem secuturam diuino instinctu prædicerent, eadem cum P. Cornelio communis fuit. Nam non multò post gloriosum eius exitum, impij illi desertores ac transfugæ cum reliquâ incendiariorum ac latronum turbâ missis Legatis pacem postularunt, & impetrarunt: quodque admirandum est magis, ex illis quàm plurimi ad Patrem,

Patrem illum, qui Cornelio successit, se conferunt, & Christianis sacris imbui ac lustrari desiderant. Nimirum hoc est quod Cornelius non inani vaticinio præmonuit, de quo dubitari non sinunt eius, quæ nobis ad manum sunt, litteræ, quibus hoc ipsum tantò antè denuntiauit. Ita illæ habent, ad P. Andreæ Ægidianum Cinaloæ Apostolum 17. Decemb. 1648 datæ: Scit R. V. quo consilio huc venerim, quo desiderio aggregandi animas illas dissipatas ouili amabilissimi Ducis nostri IESV CHRISTI. Iam plenus Dei spiritu ad illos pergebam, cùm illi ingrati viam mihi & salutem suam obstruunt, & cursum Euangelicum retardant. Ita spes eorum conuertendorum non affulget, antequàm post belli huius nebulas affulgeat optata pax, & ea quam Regi Deoque debent obedientia. Hoc si consequimur, ut Deo fauente consequemur, breui post duos tresue menses vexillum sanctæ Crucis in medio illorum plantabo in magnâ paupertate. Nam annionam, quam mihi seruabat P. Pascual, omnem auexerunt illi rebelles. Verùm minùs inopiam timeo, qui vitæ iacturam non reformido pro amore IESV CHRISTI. Ita ille. Quæ propterea memoranda duxi, ut ostenderem quis sit Tataumarensium rerum status, quæ vaticinationis illius Cornelianæ fides, cùm ab eius

morte

inorte sedato barbarorum tumultu, & amicitia foedere firmata, reuocari coepere neophyti, lustrari profanata loca, pro sublato Patre vicariae submitti operae, rebelles ipsi ad capeffendam religionem excitari & accurrere.



RELAT

RELATIO
DE CAAIGVARVM
GENTE, COEPTA
AD FIDEM ADDUCI,

Ex litteris R. P. Nicolai del Te-
cho, aliàs du Toict, Insulensis,
datis ex Residentiâ S. Mariæ
Maioris ad Vruaicam fluuium
prouinciæ Paraquatix anno
1651.



IN Reductione, siue oppido,
S. Mariæ Maioris, quæ ad
Vruaicam fluuium sita est,
cum Patre Alfonso Guttie-
rez asthmate periculoso la-
borante, dego. Curam hîc nos duo gerimus
bis mille & sexcentorum Indorum: quo-
rum multi recenter ad Christum conuersi.
Quare eorum institutio, intentum studium
& assiduitatem exigit. Huic labori alter ac-
cessit nihilo minor, nempe Caaiguarum
gentem ferocissimam mansuefaciendi, & ad
Neophytorum oppida reducendi. Quæ res
ut

vt clariùs intelligatur, operæ pretium fuerit huius gentis mores, patriam, & ad fidem adducendi conatus, spesque futuras, breuiter describere.

Caaiguarum gens est minimè numerosa, omniumque Indorum inutilissima. Ij inter Paranam & Vruaicam amnes, maximè quàm Ignasu flumini propiores sunt, in siluis habitant: vnde passim à circumiacentibus populis Siluicolæ, (quod nomen Caaigua sonat) appellantur. Propriâ linguâ gens vtitur, haud sanè ad cognoscendum facili: quippe dum vocem edunt, sibilare, & inarticulatos schlopos in gutture turbinare potius, quàm loqui videntur. Pauculas casas, easque ab inuicem longè remotas habent. Eorum plerique antris contenti, ceu feræ vitam degunt: nec pænè maior illis, quàm ipsis feris ciborum prouidentia est, adeò neque agriculturam, aut aliam rusticationem exercent. Sagittâ piscantur, venanturque: sed maximam anni partem crudis vermibus, muribus, fornicis, & aliis animalculis, parabili sanè ciborum genere, vescuntur. Anthas, quas nos magnas bestias vocamus, cum ipsis luctando mactant, comeduntque: simias verò, per arbores adrependo, ita assequuntur, ac si ipsi simiæ essent, quarum carne maximè delectantur; nec ab esu tigrinæ adhorrent. Mel siluestre
C illis

illis in deliciis est, cuius potu ita incalescunt, ut illo se nudi homines contra frigora tueantur, & ad faciendâ bella animent. Porro illorum bella tam ignobilia sunt, ut propiora sint ferarum insultibus, quam hominum certaminibus: nam cum in silvis perpetuò degant, quotidianâ exercitatione per spissitudinem vepretorum spinetorumque tam expeditè ambulant, quam ipsæ viperæ: ita ut serpere potius, quam pedibus incedere videantur. Ex sepibus viatores incautè in suis terris dormientes, sed noctu tantum, aggrediuntur, mactantque, non tam vindicandi se, aut alienarum rerum cupidine, quam quadam ferocitate animi; atque hanc feritatem liberali planè appellatione bellum vocant, quod bellandi genus ab ipsis tigribus didicere, quibuscum illis perpetua conflictatio est: nec aliam rationem ipsi paucitatis suæ reddunt, quam quòd continuis tigrium insultibus diminuantur. Rabiem pro virtute habent, ceteras animi dotes ignorant. Subinde usque ad portentum corpore deformes sunt, tam simiis similes, quam hominibus, præsertim si nares spectes, quibus simos iure optimo dixeris. Dorsum plerique, quòd sub nemoribus vivat, gibbofo & incuruo sunt, adeo ut mediocris corpore terram proni adspiciant. Multi tamen inter eos formâ honestiore sunt, præsertim

fertim mulieres, quæ in vmbra natae educa-
tæque, corporis colorem Europæis non ad-
modum abfimilem conseruant. Vtrique
sexui tenuisrationis vsus est, quam cibi ge-
nere, & quotidianâ feritate, libertateque
vitæ (quod à pueris nulli officio assuefacti,
nihil omnino præter voluntatem faciant) ita
deprauant, vt ab ipsarum ferarum moribus
vix latum vnguem absint. Vrticis se mulie-
res à cingulo ad genua vestiunt, quas pri-
mum lini instar macerant, digitisque pe-
ctunt, deinde in retis formam nectunt. Vi-
ri autem vestes nullas habent præter pelles,
ob quarum paruitatem, omnes ferè apertæ
sunt corporis partes: & quamuis nudi sint,
ita toto corpore obcalluerunt, vt per vepres
& spinas illæsi, necnon absque formidine
incedant. Nullam ferè rem ad se ob suspi-
cionem importari desiderant: sed quæ sunt
apud eos nata, praua atque insipida, hæc
quotidiano vsu sibi vt sapiant, efficiunt. Si
qui capiuntur, difficilius quàm ipsæ feræ
cicurantur. Nam aliquando visi vincula,
quamuis ferrea, mordere dentibus, & rabi-
dorum in morem toto ore spumare. Quin
assuescere ad aliorum consortium, & man-
suescere vix ipsi etiam paruuli excepti pote-
rant. Si in vinculis diutius relinquebantur,
quadam impotentiâ animi, vti animalia,
quæ extra elementum suum educari ne-
queunt,

qucunt, paucos post dies non admissis cibis moriebantur. Cum hac gente Paranenses, antequàm Christo darent nomen, inimicitias exercuere: nec alia bellandi caussa vtrisque erat, quàm vt carne hostili, ceu venatores ferinâ, vescerentur, aut certè periculum à se auerterent, vti Europæis mos est, lupos, ne noceant, occidere. Sed Caaiguæ victos se adeò dolent, vt quamuis subinde ab hostibus veniam accipiant, neque cibum sumant, nec vûlnera curari patiantur: & ægrè ab aliquibus obtentum, vt vellent vivere. Porro cum in oppido Beatae Mariæ Maioris, Ignâsu dicto (in quo iam ego dego) adolescentulum ex eâ natione vnum P. Claudius reperisset, pretio redemptum apud se educauit, (quo interprete ego nunc vtor) eo fine, vt & linguam Guaanicam moresque Christianos disceret, subinde verò religionem apud populares, relatis magistrorum suorum sententiis, interpretaretur. Res successit è voto: nam cum Caaiguæ viderent ab eo tempore, quo Guarani, neophyti nostri, Sacerdotibus externis se subdiderant, vix amplius violentos esse, nec se ab iis ad necem quæri; quorundam animos subiit desiderium res Christianorum propiùs perspiciendi. Ideò ex spelæis nonnulli egressi, commercij obtentâ specie, ad vicina oppido Sanctæ Mariæ Maioris loca cymbâ

cymbâ prouehuntur, factoque vtrunque regularum suarum per interpretem commercio, ægrè tandem impetrarunt, vt eorum Casiquius, qui aderat, cum aliis quatuor, oppidum ingrederetur, & sociis IESV se sisteret. Magnum ad id momentum attulit adulescens ille, qui Patrum beneuolentiâ ad externorum hominum consortium assueuerat. Ad omnia stupebant siluicolæ. Ita splendida illis visæ sunt luteæ stramineæque sociorum domus, vt rusticis Europæis urbem primùm ingredientibus superba Regum palatia. Spectatores interim non sine formidine circumstabant: nam audierant, ex improviso eiusmodi homines fanaticorum in morem furere, & cum mansuefactos putes, ferarum instar in adstantes inuolare: in omnes itaque eorum motus, gens intenta ad fugam sese suspensò pede disponebat. Sed eâ minimè opus fuit; nam Patres nostri prudenti consilio, cum rationibus apud hanc gentem agere se posse desperarent, ad cælestia auxilia confugere. Lipsano thecam igitur, quâ S. Xauerij ossis frustum claudebatur, aduenis ostendere lubuit, vt ab Indorum Patrono opem sentirent: non ineptè conicièntes in cælis auctum Xauerij amorem esse, quo quondam, dum viueret, Barbarorum animos deperibat. Barbari thecam tetigere, vultum mutauere, indicem mu-

tatæ mentis; itaque se tractabiles præbuere, ut assererent, se aliàs redituros, suisque popularibus narraturos quæ viderant. Nec ea parua gloria S. Xaverij est, post tot ætates in ossibus mortuis vigorem conservantis, quo vivus barbaros subigebat. Sanè ex animi modestiâ passim asseriebant Patres, plus mutum & pictum Xaverium potuisse, quàm vivæ ceterorum virtutes. Exinde sermones de Deo feri homines arripiebant avidè, & oris alacritate, audiendique cupiditate satis manifestè ostendebant, se ad capeffendam virtutem cælitus esse commotos. Cibos itaque positis suspicionibus à Patrum manibus non illibenter admittebant: dolebantque Patres, se ob linguæ inscitiam, & interpretis stupiditatem, non animi sensa explicare, non percontantibus satisfacere planè posse. Porro haud dubij quorumvis animos beneficiorum assiduitate vinci, eorum benevolentiam benefactis sibi conciliabant. Omnes igitur à Patribus liberaliter donati sunt, & coram illis lætitiæ ostentamenta, qualia in festis solent, procurarunt. Lepidum erat ad æris campani tactum, ceu ad tonitruum, attonitos cernere: mirabantur enim qui tantilla moles adeò vocaliter loqueretur. Sed lepidius fuit, feros homines, tigrium barritibus tantum affuetos, ad musicæ numeros numquam antè auditos subsilientes videre,

videre, & Neophytos pueros ad symphoniacas modulationes saltantes palam imitari. Iam non miror poetarum commentum, afferentium ab Orpheo saxa & feras fidium harmoniâ post se tractas, si pueri idem hîc iam faciunt. In patriam redire volentibus nauigium, quo ycherentur, Patres frondibus & floribus exornarunt, externis quibusque officiis, barbarissimos hominum, si possent, allecturi: datâque spe sui reditus, eo quo venerant die abierunt. Numquàm deinde Patres occasionem omiserunt de hac natione benè merendi. Idque Barbaris satis cognitum erat: nam cum fama vulgasset dycolos quosdam sanctæ Mariæ Maioris oppidi incolas, in Caaiguarum fines antiquo more hostiliter irrupisse, Patres nostri in reos seuerè animaduenterunt.

Deinde P. Petrum Aluarum nouus incessit ardor Caaiguarum terras peruadendi, Christi que legem apud nationum omnium barbarissimam promulgandi. Bonâ igitur cum P. Petri Romeri, tunc Missionum Superioris, nunc clarissimi Martyris, veniâ, aliquot Indis comitantibus, ex Acauaia Neophytorum oppido iter arripit; transmissaque Paranâ, siluas densissimas, nullique præterquam tigribus peruias, ingreditur; perque earum densitatem sibi viam aperit, tantâ corporis contentione, oblectationeque,

que, vt breui inter vepreta illi religiosa vestis exterior discerpta sit, solumque thorace, & caligis; quantum ad nuditatem tegendam sufficerent, integris, tectus, reliquum iter confecerit, tanto incommodo periculoque, vt vestitus flumina collo tenus, ac paludes pluuio maximè cælo transmitteret, eoque loci dormiret, vbi frequentia tigrum vestigia, & semel à feris hominum cadauera viscebantur. Post nouem dierum iter egregius animarum venator, ferorum hominum spelæa ingressus, per interpretem effecit, vt octodecim qui aderant Christo nomen darent, seque sequerentur. Neque illi admodum inuiti sua deseruere, nam tot tigrum insultibus consternati erant, vt vix vitari diutius in his nemoribus protrahere se posse considerent. Narrabant enim, paulo antè quàm Pater veniret, homines duos à tigribus discerptos, & tres mulieres viperarum morsu periisse. Cumque Pater de vicinis populis quæreretur, hæc ferme reperit: nempe Ibagobium Christianum transfugam ad se non ita diu venisse, multisque Caaiguarum persuasisse, vt se sequerentur, eoque duxisse, quò non facilis esset aliis, quàm ipsi siluicolis, accessus: inuium enim esse iter per montium abrupta, & tigribus anthisque obnoxia loca, nec satis sciri vbi sedem fixerint. His auditis Pater Aluarus reditum
adornat:

adornat : nam vires , quas siluestribus bac-
cis, herbisq̃ue sustentabat, eum defecerant.
Prædâ ergo potitus, pari labore & incom-
modo iter suum relegit. Pedibus ferme ibat
nudis, & ferè sine vestibus, quòd riui am-
nesq̃ue yado, aut natatione transeundi se
passim offerrent. Itaque sæpenuerò fati-
scente corpore ex alboris & famis iniuriâ
grauiter laborabat, passimq̃ue genua sub-
sidebant, continuo etiam spinetorum oc-
cursu fatigatus, lubricitate aut asperitate viæ
fallente vestigia, toto corpore corruebat.
Quæ ille omnia non æquo solùm, sed in-
tento in Deum superabat animo : quippe
tanta erat inuentæ prædæ P. Aluaro volu-
ptas, vt cùm in vepres se induceret, vel ad
saxa offensus pedes laceraretq̃ue, aut cùm
imbribus maderet, aut frigore confectus &
fame rigesceret, vbi humana ærumnarum
subsidia, solatiaq̃ue suppeterent nulla, gau-
dio exilire videretur. Ægrè superatis viæ
difficultatibus, tribus septimanis in itinere
exactis, demum defectissimis viribus Aca-
uâiam Dei benignitate saluis & incolumi-
bus comitibus peruenit. Et cùm vsu com-
perisset, Caaiguarum gentem ex patriis te-
nebris abductam, ceu pisces extra elemen-
tum, statim emori, nequaquam sibi cun-
ctandum duxit; quin statim tentaret, quo
tandem animo Christianæ legis documenta
addisce-

addiscerent. Reperit eorum animos ad retinendum ineptos, & ad benè intelligendum obtusos. Memor itaque Diuinæ clementiæ volentis homines & iumenta saluare, raptim, num crederent Christi mysteria, à singulis inquit; cùm assererent, volentes baptismo initiari: & paullò post omnes nemine dempto moriuntur. Quod vt vidit Petrus Aluarus, post tantos itineris labores enimuerò gauisus est suum manipulum ex segete relatum, dignum fuisse, qui in æterni Patris horreum transferretur, in tantillo numero illâ se cogitatione consolans, gloriosum esse pro Christo non solum multa agere, sed etiam pauca agēdo multum pati.

Deinde numquàm Caaiguarum gens nisi hoc anno adita est: nam cùm Mammaluci latrones ad eos abigendos venissent, timereturque ne in nostros Neophytos committâ hac gente, irruptionem facerent, sexcenti circiter Paranenses Indi, quibus additi sunt duo ex nostris Patribus, eò mense Martio proximè elapso perrexerunt. Commodè accidit, vt Caaiguarum siluas eo tempore ingrederentur, quo Mammaluci latrones de gente abigendâ cogitarent: quare nostri arma expediunt, abactisque vi latronibus sexaginta circiter Caaiguarum capita è seruitute liberant, & ad Neophytorum oppida latronum spoliis onusti reducant.

Hunc

Hunc Caaiguarum manipulum reductio-
num omnium Superior ei oppido, in quo
ego verſor, addixit, mihiq̃ue eorum curam
commendauit. His itaq̃ue bidui itinere ego
obuiam progreſſus cum equis & curribus,
omnes incolumes, magnâ vtique animi mei
voluptate, adduxi. Lepidum erat videre
homines ad omnia ſtupentes: nam nec ha-
ctenus equos viderant, nec currus, nec bo-
ues, denique nihil præter ſiluas ſuas, & ar-
bitrabantur, ni fallor nos petafatos calcea-
toſq̃ue naſci: nam non ſine admiratione cal-
ceos noſtros attrectabant, & tibialia. Qua-
tuor ſuperioribus menſibus lautè eos excepi
& alacriter habui, & præquam ſperabatur
beneficiis ita paullatim manſuefacti ſunt, vt
ad Neophytorum noſtrorum mores proxi-
mè iam accedere velle videantur. Per cum
interpretem, de quo ſuprà meminimus, cum
iis ago, cuius auxilio breuem catechiſinum
mihi compoſui. Tres adulti hæctenus tan-
tùm mortui ſunt, & quatuor pueri, omnes
ſuſcepto baptiſmo. Reperi eam gentem
nullum nomen habere, quo Deum & ho-
minis animam ſignificet. Nulla ſacra habet,
nulla idola: quare non difficulter, quæ de
Deo fides nos docet, credunt: reliqui ſu-
perſtites commodâ vtuntur valetudine, qui
omnes à me petierunt, vt vellem ad eorum
terras pergere ad inuitandas ſuæ gentis re-
liquias.

liquias. Quæ res me mouit, vt à Superioribus meis eam missionem enixè peterem, quam tandem obtinui. Mense itaque Septembri proximè sequenti, cum sexaginta circiter Neophytis, ad eorum terras, 60 leucis hinc distantes, Deo dante, pergam. Deum optimum, maximum rogo, vt me adiuuet, & hanc gentem ad caulas Ecclesiæ suæ tandem adducat: quod, nisi peccata mea obsint, futurum spero.

P. Adrianus Knudde Brugensis, ex prouinciâ Flādrobegicâ olim huc missus, cuius per quadriennium in missionibus socius fui, Martio proximè elapso mortuus est, postquam inter Indos viginti annis vtiliter valde vires & industriam magnâ cum ædificatione in summis vitæ periculis cōsumpsisset. Eius ego Vitam, iussu Superiorum, Hispanicè scripsi.

P. Iustus Van Suerck, ex eadem missus prouinciâ, vir verè apostolicus, adhuc præest missioni Statinensi, & egregiè insudat in reformandâ denuò reductione B. Mariæ Virginis Foyensis, quam Mammalucilatrones inuaserant. Ducentis circiter leucis ab inuicem absimus: & hoc temporis momento, quo hæc scribo, nuntius adfertur, septingentas Indorum familias à bono Patre ex nemoribus, ad quæ post Mammalucorum inuasionem confugerant, summo labore denique

rique reductas. Reliqui Belgæ benè & vtiliter operam ſuam inter Indos collocant.

Rex noſter, & ſenatus regius per literas monuit, vt Boni-aëris portui ſedulò inuigiletur. Reſciuiſſe enim ſe, eum portum per vim Luſitânos ingredi velle. Mammaluci latrones noſtris inhiant Neophytis; veremur-que, ne nos iunctis viribus ſequenti anno aggrediantur. Succuſſantis terræmotus nondum ſubſidit.

Magnâ hîc vrgemur operariorum penuriâ, & niſi multi cum Procuratore veniant neſcio quid remedij ſit : Deus vineæ ſuæ providebit.

Ex aliis litteris ex eadem Paraquariâ.

Ante duos & ampliùs annos Paulopolitani ex Braſiliâ prædones duas Reductiones vaſtarunt, traiccto vno è noſtris plumbeâ glande : facile iis fuit in illos incautos irruere, quòd à ceteris, quæ ad Paranam, & Vrugaicam fluuios ſitæ ſunt, longè abeſſent. Porro de cælo iſtarum regionum vt aliquid etiam dicam, & glebæ fertilitate, id ſcire oportet, hanc noſtram, quam Paraquariam appellamus, prouinciam, tres Præfecturas complecti; Paraquariam, Tucumanicam, & quam à flumine Argenteo vocarunt, quæ omnes vt foli feracitate diuerſæ ſunt, ita & cælo. Paraquaria Braſiliam imitatur, omniſque illa terra, quæ Paranae, ac Vrugaicæ flumini

flumini adiacet, licet moderatiùs æstuet aliquantò. Hinc fructuum eorum, quibus Brasilia abundat, ferax est, quorum nomina, utpote Europæis ignota, referre nihil iuvat. In hoc Brasiliæ hæc antecellit, quòd, præter saccharum præcipuas Brasilorum diuitias, etiam vinum ferat, idque non vulgare; nec triticum desit, quo Brasili ferè omnino carent: licet etiam hîc illâ farinâ ex certis radicibus confectâ, pro pane vulgò vrantur.

Illa verò regio quæ ad Argentei fluminis præfecturam spectat, ac diœcesin in spiritualibus, licet peregrinis & Europæ ignotis fructibus rebusque minùs abundet, tamen ea, quæ huc inde aduecta, eo prouentu sunt aucta, ut admirationem mereantur. Equorum, qui ante Hispanorum aduentum, ut & boues, Indis numquam visi erant, ea nunc est copia, ut armenta innumera, per immensa camporum æquora vagentur, illique domino cedant, qui iniecto eos laqueo venando capere voluerit: & sæpè equus Philippæo, imò medio, nonnunquam etiam viliori pretio veneat. Bouum pariter ita abundè est, ut qui decem, aut duodecim millia suis in prædiis possideat, non inter eos censendus sit, qui maximè abundet, cum non desint qui ad trigesies, aut saltem amplius vigesies mille numerent, imò
quorum

quorum numerus iniri non poffit. Hinc pretium bouis vulgare eft Philippæi vnus. Cùm tamen fpectato rerum aliarum pretio (quæ nimirum ad cibum non pertinent) eo loco cenfeatur Philippæus, quo in Hifpaniâ octaua eius pars; ideoque hîc fufficiens ad peccatum mortale in genere furti cõftituendum materia effe non iudicetur. Imò cùm naues ex Hifpaniâ adfunt, quibus bouum coria in Hifpaniam auhenda traiciantur, pluris eft corium, quàm ipfa vacca. Malorum etiã Perficorum ita ferax eft tellus, vt in fuis villis integra illarum arborum nemora habeant, & inde ad domefticos vfus, & focum cuique ligna fuppellant. Perdicum prætereà genus eft omnibus quacumque euntibus maximè obuium: ei exiguus alarum vfus; nam neque in fublime fe attolit, cùm volat, nec vno impetu ad longam diftantiam volatum perfequitur. Iucundum earum aucupium eft longâ arundine, cui extremæ laqueus annectitur. Perdix viſo equite (nam nemo non equo vehitur extra urbem) pedibus primùm fugere, mox, illo propius accedente, toto corpore ſubſidere tamquàm præteriturum eluſura, atque ita immota laqueum ex arundine pendulum tibi indui ſinit. Tum verò dum ſerò tandem auolare nititur, coeunte laqueo auceps, ceu piſcator hamo, prædam pendentem attrahit.

ELO-

E L O G I U M
R. P. ADRIANI KNVDDE
D I C T I C R E S P I,
B R V G E N S I S B E L G Æ,
E S O C I E T A T E I E S V,

Insignis operarii in missione Paraquariensi, ibique defuncti an. 1651, Februarij 25, Hispanicè scriptum à R. P. Nicolao del Tescho, Latine ex autographo versum.



Vo maximè tempore copiosa in his Americæ plagis animarum seges, atque operarum penuria, Europæa supplementa flagitare videbatur, libuit ei, cui quæcumque libent recta sunt, strenuum nobis virum subtrahere, portantem cum exultatione in cælum manipulos suos, P. Adrianum Knudde, hîc Crespum dictum, quatuor vota in Societate professum. Vitæ humanæ annos nouenos supra quadragenos egerat, secularis ter nos su-
pra

Compendium Vitæ R. P. Adriani Knudde. 49
pra vicenos, religiosæ ceteros: iis dotibus
instructus, quæ cum instituto nostro peri-
doneæ essent, tum maximè his Missionibus
opportunæ.

Anno 1602, 17 Febr. ortum illi dedê-
re Brugæ inclyta Flandrici Belgij ciuitas;
vitam verò ingenii parentes: quàm aded
solicitatâ educatione percoluerunt, honesta
vt sola nosset, ignoraret turpia: quorum ne
nomina quidem intellexit, vsquedum
Theologia morum præceprix & vitiorum
expultrix, aliena eum flagitia scire iussit, vt
emendare posset.

Primoribus adolescentiæ annis, castimo-
niæ propositum voto firmavit: quod sedu-
lò deinde fouit, toto feruidæ ætatis impetu
in consecranda litterarum, ac pietatis incre-
menta translato. Si quid autem ab labori-
bus honestis otij superaret, id sibi oblecta-
tionis, & auocamenti loco indixit, vt varias
religiosarum familiarum domos frequens
viseret, certiore notitiam hausturus, ad
prudentem vitæ generis capeffendi delectû.

Tam lætis progressibus velificata paren-
tum pietas filium ad Louaniensem Acade-
miam mittit: vbi Philosophicum stadium
emensus, etiam Theologicum libat; clarâ
vtrobique ingenij laude, sed continentiæ ac
modestîæ vel clarissimâ.

Senferant propinqui, & agnati, quantum
D stirpi,

stirpi suæ in Adriani capite surgeret decus. Illicò ad tantæ spei adminicula conquirenda versi, adnitente præ ceteris fratre ipsius, postea Cathedralis Ecclesiæ Brugis Canonico, iuuenis animum exstimularunt, ut se in altioris fortunæ splendorem daret: tum in Canonorum Brugenſium cœtû locum ei propoſuere, opimum vectigalibus, dignitate honorificum, velut aptiſſimam baſim, inquam euecta eius doctrina & probitas commodius se ostenderet publico, famæque assignaret. At ille propositas inter morituræ gloriæ spes omnes pro Christi amore aspernatus, in humilem ac minimam eius Societatem adlegi præoptauit: cuius ambiendæ præhensandæque consilia mente agitantem singularis quidam casus ad certam ratamque animi æstimationem impulit.

Louanij duos eiusdem litterariæ laureæ rituales inter se commiserat æmulatio: quorum alteri beneuolum ac suffragatorem Adrianum, alter irarum impotens tollere è medio statuit. Dumque sceleris opportunitatem captat, fors illam offerre visa est. Inaudierat inuisum sibi Adrianum foris apud unum ex amicis cœnitare. Aduolat armatus, viamque insidet, per quam à cœnâ domum se relaturus erat, ut redeuntem & incautum clam ferro superet. Sed innocentis famuli sui salutis consulturus Deus, eam eius

conni-

conuiuatori mentem iniecit , vt protractis in seram noctem sermonibus, quem mensâ exceperat, etiam lecto, propter frequentia in plateis tenebrarum pericula; retineret ad quietem.

Ita frustrato feliciter insidiatore , postquam resciiuit Adrianus, quanto eum discrimini subduxisset Deus, gratum se illicò præbiturus , vitamque reliquam Seruatori suo dicaturus, annos natus viginti tres, Mechliniensis tirocinij nostri domum subit ; anno 1625. 25 Junij.

Expleto biennio, conceptisque de more votis, Louanium remittitur , Theologicis excolendus, daturusque operam iis sapientiæ magistris, quorum non verbis modò ad disciplinam, sed & exemplis ad sanctimoniam eruditus, eximiam literarum ac virtutum mixturam fecit; ignarus tunc quantum inde Diuina prouidentia fructum breui esset excitatura. Contigit ea res in hunc modum.

Significauit sociis Europæis P. Gaspar Sobrines , indigere Paraquariensem hanc barbariem operariis, qui & virtute præstantes essent, & in musicis exercitatissimi. Non peritiorem alterum P. Adriano Knudde habere se ad manum censuit R. P. Florentius de Montmorency Flandro-Belgicæ tunc Prouincialis , qui cum & generosos

eius ad virtutem animos, ardentemque pro salute proximi zelum probè nosset, cum cum aliis duobus sociis Iudoco van Suerck Antuerpiensi, qui Iustus Mansilla hîc appellatur, & P. Iacobo Ranzonier, qui Ferrerus, barbaræ huius gentis cultorem elegit.

Qui delectus ei ante refectiorem denunciatus, tantâ pectus eius tamque inexpectatâ superfudit lætitiâ, ut & prandij tempore cibum capere vix posset, & solutâ mensâ, nihil moratus, Patres, Fratresque carissimos postremum salutaret, eorum non paucis tam beatæ sortis sanctam invidiam, omnino omnibus tantæ virtutis admirationem relinquens.

Exemplò viam init, grauibz utique incommodis emetiendam. Cum enim Parisios attigisset, auctor illi fuit Collegij Rector ut reliquum iter pedibus, Apostolicâ paupertate & patientiâ conficeret. Obsecutus, quoad licuit, fatifcentia lassitudine membra Burdegalam usque traxit. Eò ap- pulsum novus excipit labor. Afferitur enim P. Gasparem Sobrinum iam Vlyssipone versari, breui in Americam vela facturum : accelerandum esse, si comes adiungi vellet, & veredorum cursu illuc prouolandum. Territus hoc nuntio, utpote tam citatæ equitationis prorsus imprudens & inexper- tus, P. Carolum à Lathoringiâ domus Pro-
fessæ

feſſæ Præpoſitum conſulit, ſuamque curſoribus equis vtendi inſolentiam denuntiat. Sed ab eo, Dei cauſâ, fortiter inſueta tentare, & proſpera ſperare iuſſus, tam ſtrenuè iter citatis equis peregit, vt quamuis durâ, tamen felici viâ, ad Luſitanicum littus tempori ſe liſteret, ac paucis poſt diebus, conſcensâ nauî, alto ſe permitteret.

In eâ nauigatione tam illuſtria probitatis, & induſtriæ argumenta edidit, vt Paraquarienſi potitum portu, religioſi Præſides, ſine morâ ad Miſſionum culturam adhibuerint, & quaternis earum præfecerint. Vbi quàm nauum ſe Societatis operarium tribus & viginti annis præbuerit, operæ pretium erit paucis enarrare, tum ad memoriam poſteritatis, tum ad tanti viri gloriam illuſtrandam, tum denique ad documentum è tam ſplendidis exemplis hauriendum.

Simul ac prouinciam ſuſcepit procurandarum Reductionum (ita enim appellamus nouas Indorum colonias, quæ ex reductis à ſilueſtri victu Barbaris, ad Chriſtianos mores, & conſortionis humanæ commercia coaleſcunt) ad linguam eorum condiſcendam tanto ſtudio incubuit, tam improbo labore eius rudimenta deuorauit, vt inter diſertiffimos haberetur: eamque cultiſſimi oris facundiam, quoad vixit, expoliuit. Ac tametiſi ex temporali oratione facilè audito-

res admiratione complere posset, scriptitabat tamen conciones suas, quarum septem vel octo syntagmata moriens reliquit, nec nisi paratè ac meditatè accedebat ad dicendum, perinde ac si in celeberrimis Europæ pulpitis verba facturus esset; illud sibi sæpè ingeminans: Maledictus homo, qui facit opus Dei negligenter.

Huius eloquentiæ, quæ Adriano inerat, zeliq̃ue diuini benè conscij Superiores, nostros ex Europâ in harum Missionum subsidia submissos, statim eius disciplinæ tradebant instituendos, vt in eos simul peregrinæ linguæ notitiam, simul Barbarorum Christo asserendorum flagrantissima studia transfunderet.

Incredibile enim dictu est, quantâ caritate feram hanc barbariem in sinu haberet atque in deliciis, vt non iam sibi, sed ipsis tantum viuere ac spirare videretur.

Altissimè enim eius animo illud Christi verbum infederat: Quod vni ex his minimis meis fecistis, mihi fecistis. Induxerat igitur animum, quantumcumque optimo Saluatori, & quasi creditori, æris alieni deberet, quoad eius fieri posset, Indis remunerare: atque in illis Christum contemplans, summâ se alacritate supremo Domino in membris suis indigenti totum impendebat.

Mira

Mira fuit eius ad beneficentiam prontas : neque vnquam pati poterat, vt vel vnus Indus solatij expers ab eius consortio, colloquioque abscederet. Si quando autem quod largiretur aliud nihil esset in promptu, iniiciebat manum tenui cupediarum annonæ, quæ recreandis hospitibus asseruabatur; eamque Indis suis viritim distribuebat, eâ significatione dulcissimi amoris, eâ vultus hilaritate, vt omnium sibi animos arctissime deuinciret. Ne quid in penuariis suis situ corrumpi sineret, maturè diuidebat absumendum. Optimum panem ac recentissimum pauperibus ægris erogabat, dictitans etiam misellis Indis Christi fraterculis boni panis buccellam benè sapere. Nec lautioribus epulis, vt quidem hæ solitudines ferunt, parcebat; etiam gallinas scitè coctas reseruandis ægris apponens. Socios verò, vt idem facerent, hortabatur: cumque eos largè quidpiam edulij Indis donasse intelligeret, quasi eo beneficio ipse esset obstrictus, eorum munificentiam multâ laude & gratiarum actione prosequabatur, vltroque etiam ad dona donis cumulanda instigans.

Probabatur plurimum Superioribus istæc animi benefica amplitudo: apud quos quamuis in postulandâ dandi veniâ propemodum nimius videretur, faciles tamen experiebatur: neque enim repulsâ dignum censebant,

ſebant, qui non ſuis commodis ſeruiret, ſed alienis, propter nimiam caritatem quâ Indos diligebat, quibus multum ſemper c. blandiebatur boni, propter ſanctæ importunitatis improbitatem.

Rectè dicitur, piæ liberalitati nullum eſſe fundum: miſericordi enim diuinæ ſuppetunt opes, quæcùm ſint inexhauſtæ, ſemper affluunt. Dabat egenis Adrianus, Adriano Deus. Tuguriolum eius ſemper omni cibario com meatu abundabat: memoresque beneficiorum Indi gratuitas operas ſeu ſerenti fruges, ſeu metenti, ſeu ſtatiua ædificanti cominodabant, Domus certè noſtra in S. Ignatij pago, quæ eſt in his Paraquariæ Reductionibus habitatio commodiſſima, eius indiſtriæ & opus & argumentum eſt. Eam quæ in pago eſt Apoſtolorum, primus inſtituit, multumque promouit. Neque parum debet eius curæ ſtudiis que ſtupana.

Proſciſcenti ad vaccas coëmendas adducendasque, Fratri noſtro Ioanni de Cardenas ſapè ſe comitem adiunxit; quamquàm tenui valetudine, & ad tam laborioſam peregrinationem imbecillâ. Porro omnes id genus aſperitates, materno inopum Indorum, quibus erant profuturæ, amore condiebat: vilibusque in ſpeciem miniſteriis ingens pretium interiore affectu ſincere

ræ caritatis addebat. Eiusdem quoque caritatis impulsu excultos agellos gossypio conferebat, plantabat arundineta, taurorum domituræ efficiendæ curam gerebat; plaustris, aratris, ferro multiplici, rastris ac securibus, rudēs ignarosque artium, quibus vitæ commoditates continentur, populos instruebat, ut sanis iuxta ægrisque prodesset.

At verò animarum illi cura longè potior. Vix ad hæc nostra in procurandâ Indorum salute munia se adiungere cœperat, cùm ei non quasi tironi, sed tamquàm multarum palmarum veterano pugili, duarum Reductionum recens inchoatarum administratio deinceps imponitur. In eo munere quantum illi sudandum, quot ærumnæ perferendæ, nemo verbis exequatur. Quæritandi erant & cogendi vnum in locum barbari idololatræ, nonnulli etiam ingenio mirè truci, quos Exmarrones vocant. Hic ille penetrare abdita nemorum, scrutari in stagnorum lacunis insulas, montes inuios ascensu superare, sexcenta incommoda tum in cibo, tum in somno perpeti, dum pio venatu prætiôsæ prædæ latibula indagat, repertosque siluestres homines salutat, alloquitur, inuadit amplexu, suauissimâ comitate sibi demeretur, ut ad socialem vitam adducat. Nulla vnquam mater caris pignoribus dulcius blandita, quàm his semiferis Adrianus;

ut

vt deuias oues bonus pastor in tuto locaret,
in sinu suo congregabat agnos.

Quos verò immansuetiores comperiebat, eos diuturniore patientiâ paullatim mitificare moliebatur. Admotos foco suo per hyemem longis colloquiis tenebat, de illorum familiis, excursionibus, piscatu, venatione; identidem aliquid esculenti vel potulenti porrigens, quod nouerat placitum. Tum sensim sermonem ad diuina & æterna flectens, flexanimâ facundiâ ferociam mulcebat. Postremò variis donis cummulatos, plenis manibus abire iubebat, ad nouos congressus in posterum inuitans. Quâ suauitate & beneficentiâ irretiti Barbari, quamuis aliàs inurbani, auidi, tenaces; tamen victo parsimonix studio, & ipsi non sine muneribus ad eum redibant, quasi liberalitate certaturi. Excipiebat illos mirificâ grati animi significatione, ac vicem remetiens, humana diuinâque abundanter regebat: cùm illud P. Iacobi Turriani dictum pro effato haberet; ad comprobanda Indis fidei nostræ mysteria, munuscula esse promiraculis.

Nullum defugiebat laboris genus, vt animarum saluti consulere. Peruadebat inuia quoque, nihil moratus cæli iniurias, seu feruido sole coqueretur, seu largo imbri totus immadesceret, dummodò è Tartarei
leoni

leonis vnguibus ac rictu prædam excuteret. Aliquando in vasto flumine, vadum equo, cui insederat, tentantem, procurentium aquarum æstus abripuit; iamque pefsum eunti obuius littoralis cuiusdam arbusculæ ramus iniectâ manu prehensus salutis fuit, dum ex eo aliquamdiu pendens, tandem accurrentium Indorum ope in ripam euadit.

Vt siluestres incolæ eius provinciæ, quam Caassapaguassu nominant, siue iam Christo mancipatos, siue fidei atque ad eò humanitatis expertes, in statæ habitationis communionem reuocaret, quàm aspera sustinuerit, vix quisquam eloquatur. Martyrio semper paratus, bis proximus, sæpius de morte triumphauit. Semel Barbari, comitate ipsos aggredientem summâ feritate repulerant: præ ceteris Caciquius quidam (ita Principes suos vocitant) iam elatâ securi minax, & in vulnus assurgens; ni furentem nonnulli cohibuissent. At quam à cæde abstinuerat manum, non perinde à rapinâ compescuit. Spoliatur optimus Pater: detractis etiam femoralibus ac tibialibus cūcitur penè nudus, biduoque ieiunus atque errabundus, tandem suis redditur. Vix domum reuersus, viribus instauratis ac fidentiâ, recurrit ad prædones, mortis & periculorum securus. Fugitantes lucem nuperi latrocinij conscien-

conscientiâ, per saltus & nemora vestigat, inuentos conciliat sibi, datâque vltro veniâ secum ad ea, quæ deseruerant, domicilia, placidè reducit, victor luporum agnus. Quin etiam ad heroicæ mansuetudinis exemplum, à P. Superiore impetrauit, vt Cacciquium, à quo securis in eum fuerat intentata, scipione tradito, quod est insigne concessi in reliquos principatus Ducem crearet.

Tot denique laboribus fessâ, fractâque Adriani valetudine, vigebat tamen infractus animus: neque veluti emeritis stipendiis prætorianus, vacationem bellicorum munerum petiit: sed militis inuicti more, cui honesta vulnera acuunt animos, non prius arma quàm vitam abiecit. Pedibus si minùs commodè ingredi valeret; reptabat tamen, vti poterat, ad Confessionis sacrum tribunal, ad ægrorum domos, & quocumque pauperum necessitas euocaret. Sæpe viribus defessus, & propè semiuinus concionale pulpitum ascendit, vt ad populum verba faceret, vel pueros fidei rudimentis imbueret; dicere solitus, neutiquam esse ignauè & muliebriter cedendum difficultatibus, sed forti pectore obluctandum. Nihil poterat illi accidere grauius, quàm si in laboriosorum munerum inter nostros partitione, per causam valetudinis, se præteritum intelligeret, præsertim in Barbarorum confessio-

confessionibus audiendis : semperque paratum se aiebat ad rerum temporalium curam quamlibet alteri transcribendam; at de sanctis functionibus nihil se omnino remissurum: affirmatque vnus ex eius sociis complurium annorum spatio, sacrorum ministeriorum statas vices ac munia ad præfinitos temporum articulos, perfectè ab eo fuisse obseruata : semel dumtaxat vi morbi vehementiore affixum lectulo, quâ horâ poenitentibus aures erant commodandæ, socium humaniter acciuisse, & rogasse vt morbum excusare liceret.

Quin etiam laudabili fraude sociorum laborem adeò frequenter subripiebat sibi, vt omnibus ad pia eius furta præcauenda solerter aduigilandum esset. Domestico laborum penso minimè contentus, si quando in vicinâ quapiam Reductione vnum tantum è nostris remansisse inaudisset, ceteris aliò digressis; statim ad eum inuisendum prodeambulabat. Specie quidem officiosæ salutationis; re verâ autem, vt omnibus illius pagi ægrotis viritim aliquid solatij dulcibus alloquiis irroraret. Non raro minutulos puissiones, quos infirmior ætas necdum comuni catechismo initiauerat, tamquam agnellos conglobabat in gregem: tum singulos diligenter Crucis salutare signum manu figurare docebat: deinde omnium animis

mis sanctum Dei timorem atque odium peccati, rationibus ad eorum captum accommodatis, altissimè insculpere nitebatur: postremo dispersitis munusculis hilares dimittebat. Erga vetulos vetulasque idem præstabat, eorum stupiditatis insulsiatistisque numquàm pertæsus.

Eodem quoque salutis Indorum studio impulsus, sollicitudinem suam in alia multa eorum adiuuandorum subsidia deriuauit. Diuino cultui promouendo quid non excogitauit, aut non perfecit? Sacrationa per annum festa celebrabat insigni apparatu. Symphoniacis describebat ipse indefesso labore tabulares canticorum notas; hortabatur verbis, & appositis ciborum lautitiis ad strenuè canendum excitabat: denique modulatè concinentibus præibat, modos manu temperans, vt inter discipulos magister. Quoscumque enim hîc musicos præstantissimos habemus, erudiuit ipse: præsertim Stapuanos, è quibus in alias Reductiones sparsi, qui eam artem docerent. Præterea in locupletandis sacrarum ædium vestiariis singularem operam impendit. Præsertim verò eius Reductionis, cui ab Apostolis inditum nomē, Hierophylacium tantâ sacrorum ornamentorum copiâ instruxit, vt nulli harum prouinciarum sacrario sit posthabendum. Biennium est, cùm de cælo

Io tacta ædes oppidi Apostolorum deflagrauerat. Tum ipse nouam opere firmo instaurare adorsus, tam copiosam lignariæ materiæ & tegularum apparationem congeffit, vt breui rediuiua fabrica de integro steterit. Vtebatur autē Indorum ministerio eâ cautione & solertiâ, vt eorum ingenitæ lentitudini neque nimum vrgendo tædium crearet, neque indulgentiâ foueret foecordiam.

Porrò tanta animi contentio in alienæ salutis procuratione, perfectionis propriæ studio detraxit nihil. Feruidus aliis, sibi ardebat & Deo: illudque asceticæ sapientiæ placitum frequens meminerat & memorabat libens; Vt instrumentum ab artificis manu seiunctum nihil quidquam operis elaborat, ita neque operarium apostolicum quidquam posse efficere fructuosi, nisi bonorum omnium Auctori ac principio adhærescat: eam autem coniunctionem in assiduâ cum Deo congressione positam esse. Nulla vnquam vis aduersæ valetudinis ei vel minimam consuetæ meditationis partem eripuit. Si statò tempore diuinarum rerum commentationem prætermittere iustæ causæ subegissent, quamprimùm posset, eam iacturam sollicitè sarciebat, vel coram augustissimo Sacramento, vel in cellulâ; semper, si per vires liceret, in genua subsidens.

Quidquid

Quidquid à necessariis occupationibus suaperforet otij, id omne in cælestibus cum Deo colloquiis transigebat, abdens se in cubiculi secretum, foribus fenestrisque operatis, ut per corporeæ caliginis silentia animi lucem affluentius hauriret.

Quotidie ad aras immortalis victimæ & litabat ipse, & litanti socio ministrabat: sic geminati sacrificij adedò cupidus, ut si peregrè prodeundum esset, socium ad rei Diuinæ horam præueniendam hortaretur, ne tanti boni expertus abiret. Solennes sacræ psalmodiæ preces non nisi locis ab interpellatore vacuis recitabat: numquàm aliena vel verbulo obiter interfatus, nisi gravis causa imperaret. Visitati cum Deo colloquij fovebat ardores piorum librorum crebrâ lectione, præsertim diuinarum Scripturarum, in quibus erat versatissimus, & commentarioli Thomæ à Kempis de Imitatione Christi.

Sanctissimam dignamque Dei Genitricem præcipuo cultu prosequabatur, eamque bonam Matrem suam solebat appellare. Huic singulis diebus, in templo, simul cum Indis Mariano sodalitiis adscriptis, cœtonam ex Angelicarum salutationum decadibus pertexebat. Hanc ita adamabat medullitus, ut ad omnem cubiculi egressum aut ingressum & salutaret venerabundus, &
maternæ

matetnæ ipsius clientelæ se peramanter commendaret. Huius in laudes omnia templi ornamenta, notosque Guacanicæ linguæ lepores ac delicias congerebat. Huius causâ sanctissimum ipsius Sponsum ter maximum Patriarcham Iosephum, Sanctosque progenitores Ioachimum & Annam colebat impensissimè.

Affiduam cum Deo coniunctionem ac rerum cælestium commentationem voluntariâ sensuum corporis, & contumacium animi affectionum coërcitione firmabat. Nullum vnquam sabbathi diem sine ieiunio præterit. Condimentis, quæ palato placitura putabat, affusâ frigidâ, demebat saporis gratiam. Mellita salgama, & quidquid saccharo conditum esset, admixto sale corrumpebat. Etsi clarè oculis videret, tamen puluisculum his regionibus familiarem, ex lapide contuso, quem vocant Petram Lipis, mordaci acrimoniâ pungentem, quasi purgandis luminibus iniiciebat, vt quod aliis pro medicamento est, sibi verteret in tormentum. Amarissima quæque circumferebat ore, dentibusque diu terebat. Extra solitas prandij cœnæque accubationes omnipotione temperabat: aut si quid in merendâ gustasset, dormitum ibat incoenatus.

Iam verò vestium ysus omnisque domesticæ suppellectilis ratio inopi congruens.

E

perpe-

perpetuum generosæ paupertatis tropæum erat. Vilissima quæque vindicabat sibi. Letulum operiebat eodem stragulo, quo per annos complures gloriosæ memoriæ Athleta Christi P. Rochus Gonzalez fuerat usus, trito laceroque. Eius industria toties reconcinata, tot laciniis segmentisque constabant, ut lintei, ex quo primitus confecta fuerant, pars nulla posset à reliquis internosci. Intimæ autem vestes omnino panniciæ, vix centonibus dignæ: quibus se nihil unquam pauperius, ne dicam mendicius, vidisse affirmabat unus è nostris.

At commotionum animi compressio, quam interiorem mortificationem vocamus, in Adriano fuit admiranda. Biliosæ temperaturæ suæ vehementiores impetus ita domescerat, ut naturæ ingenio pituitoso esse videretur. Quod si fortè acrior indoles subito procursu in immoderatus quidpiam erumperet, colligebat se percelleriter, atque omisâ inquieti animi perturbatione, utilitatem è defectu capiens, altius in sui notitiam despectumque descendebat, nihil sibi ex se inesse intelligens præter meram infirmitatem ac miseriam: tum ipso lapsu factus cautior ac vegetior, tollebat animos, & ad virtutis absolutionem consecrandam se alacrius incitabat. Si quem à rectèceptis descivisse audiebat, id sibi ad clariorem

clariorem propriæ imbecillitatis cognitionem putabat esse documento: casibusque alienis miseranter ingemiscens, diuinæ benignitati gratè referebat acceptum, quòd eius ope staret in gradu.

Domini sui gloriæ, non suæ, sincerè atque ardentè studebat. Nihil illi potius quàm latere, despici, ignorari; laudari autem non minùs acerbum, quàm superbis vituperari. Votorum illi summa, vitam eius absconditam esse cum Christo in Deo. Sententiam alienam semper lubens anteposuit suæ. Vti regebat suauiter atque amanter, ita regentibus vicissim parebat demississimè, eorumque seu iussa, seu consilia, conquistis rationibus tuebatur.

Prudentiâ excelluit in primis. In grauioris cuiusque negotij deliberatione, rationum momenta in vtramque partem commentabatur, tum diligenter perscripta æquâ iudicij lance ponderans, enixè petitâ Diuinæ lucis ope, quid esset optimum factu maturè statuebat; postea tam strenuus in exequendo quàm fuerat in consultando consideratus & grauis. In leuioribus autem & quotidianis negotiis suscipiendis, oculos attollebat in cælum, priùs quàm agenda decerneret. Nulli consiliùm dedit, nihil operis inceptauit, numquàm legere quidquam aut scribere est aggressus, non præ-

missâ adoratione Numinis, postulatione cælestis auxiliij, & consiliorum omnium in Diuinæ gloriæ scopum conuersione. Quod quidem eo tenore vitæ & sanctæ assuetudinis constantiâ factitabat, vt esset omnibus admirationi iuxta atque exemplo: verè vir interior, Deo plenus, & operum spiritali succo refectorum effector. Verè ex eorum numero, qui Optimo Maximo Conditori holocausta medullata indefinenter offerunt; dignusque cuius sanctam vitam sancta mors exciperet; atque obedientiæ & caritatis sacrificio consummaret.

Ante geminum mensem quàm excederet è viujs, visum est Reuerendo Patri Prouinciali, Stapuanæ Reductionis Indos è sedibus suis noxij cæli vitio infestis ad salubriora loca transferendos. Visum item ad eam migrationem incolis suadendam, necessariam esse Patris Adriani notam prudentiam, auctoritatem, eloquentiam. Is itaque actutum imperata facturusex Vragai Stapuam versùs iter intendit, quàmuis inualido corpore, & iam febriculæ principis malè affecto. Adueniens illuc, ineunte anno 1651 multos Barbarorum centenarios grassantibus morbis stratos, ipse languidus solari, & quocumque poterat subsidio procurare cœpit: vsque dum exhaustis viribus Antecinceralium penultimo die, acerrima

rima eum febris & copiosus sudor inuasit. Nec propterea labefactari potuit, aut incepto absistere iniecti viri constantia: donec primo quadragenarii ieiunii die, cum illud solemne carmen audisset, Memento homo, quia cinis es, & in cinerem reuerteris; supra modum debilitatus sacrificare non potuit, & ad eius solatium atque auxilium, è vicinâ Reductione vnus è nostris Sacerdos accurrit. Sequenti deinde Feriâ sextâ, pridie quàm moreretur, Diuino Eucharistiæ pane refici gestiens, eum ad se in cubiculum afferri non est passus; sed seruum Domino occurrere, non Dominum seruo par esse dicens, lectoque ægrum corpusculum ducens, ad templum vsque reptauit, vt Seruatoris præsentia conuiuioque foueretur: id animo propositum habens, vt illud opere præstaret, quod toties summo affectu interfirmandum pronuntiauerat: Domine non sum dignus, vt intres sub tectum meum.

Tandem postero die, qui fuit Februarii vigesimus quintus anni 1651, cælesti viatico passus, & sacro ad supremam luctationem oleo inunctus, postquam dixisset, nullo se animi angore sollicitari, & sancto diuini amoris dolore, omnes vitæ antea actæ noxas esset execratus, placidissimè conquiescens, ad laborum suorum remuneratorem abiit. Eius obitum simul inaudiuerunt Indi, effu-

70 *Compendium Vitæ R.P. Adriani Knudde.*
si in gemitus & lamenta, communis parentis
desiderium illis vocibus testabantur: nos igitur
deseruit ille Pater nostri amantissimus,
salutis animarum nostrarum tam cupidus,
corporum etiam tam maternam curam ge-
rens? Ille tam munificus in donis, tam po-
tens oratione, tam eloquens in suggestu?
Neque verò nos minor ægritudo incessit,
ex iacturâ socij tam beneuoli, operarij tam
Apostolici, viri denique tanto virtutum o-
mnium exemplo spectabilis. At vos, Patres
Europæi, illacrymate nobis, & tam egregij
Fratris vestri benè merito spiritui æternas
lauros, si quidem iam earum compos factus
est, gratulamini. Sin eas, ob humanæ macu-
læ residuum quidpiam, necdum consecutus
est, consuetis suffragiis accelerate. Ex Pa-
raquariâ. Mensis Martio, anni 1651.

AD MAIOREM DEI GLORIAM.



*Impressum cum Facultate, & legi-
timâ approbatione.*

4.

